



Na osnovu člana 39. stav 1, člana 5. stav 2. i člana 8. stav 4. Zakona o komunikacijama („Službeni glasnik BiH“, broj 31/03, 75/06 i 32/10), Vijeće Regulatorne agencije za komunikacije, na 58. sjednici održanoj u Sarajevu, dana 25. 09. 2012. godine, *donosi*

PRAVILO 66/2012
O OBAVLJANJU DJELATNOSTI OPERATORA
JAVNIH ELEKTRONSKIH KOMUNIKACIJSKIH MREŽA

DIO PRVI - OPĆE ODREDBE

Član 1.

(Predmet pravila)

- (1) Pravilom o obavljanju djelatnosti operatora javnih elektronskih komunikacijskih mreža (u daljem tekstu: Pravilo) propisuju se uslovi za stjecanje prava i osnovna pravila za obavljanje djelatnosti komercijalnog operatora javnih elektronskih komunikacijskih mreža u Bosni i Hercegovini.
- (2) Javna elektronska komunikacijska mreža ima značenje dato u Direktivi 2002/21/EC od 7. marta 2002. godine, i označava: prijenosne sisteme i, kada je primjenjivo, opremu za komutaciju ili rutiranje i druge resurse koji omogućavaju prijenos signala žičanim, radio, optičkim ili drugim elektromagnetnim putem, uključujući satelitske mreže, fiksne (preusmjeravanu komutacijski ili paketima, uključujući Internet) i mobilne zemaljske mreže, električne kablovske sisteme, u mjeri u kojoj se isti koriste u svrhu prijenosa signala, mreža korištenih za radio i televizijsko emitovanje, i mreže kablovske televizije, nevezano za vrstu informacija koja se prosljeđuje.
- (3) Ovim Pravilom se uređuje korištenje javnih elektronskih komunikacijskih mreža radi pružanja javnih telekomunikacijskih usluga.

Član 2.

(Pravo na obavljanje djelatnosti)

- (1) Pravo na obavljanje djelatnosti operatora javnih elektronskih komunikacijskih mreža ima pravno lice koje je kod nadležnog suda registrovano za obavljanje neke ili svih sljedećih djelatnosti iz Standardne klasifikacije djelatnosti:
 - a) Djelatnosti žičane telekomunikacije, za žičane mreže (61.10)
 - b) Djelatnosti bežične telekomunikacije, za bežične mreže (61.20)
 - c) Djelatnosti satelitske telekomunikacije, za satelitske mreže (61.30)
- (2) Pravo na obavljanje djelatnosti operatora elektronskih komunikacijskih mreža stječe se izdavanjem Dozvole za obavljanje djelatnosti operatora javnih elektronskih komunikacijskih mreža (u daljem tekstu: Dozvola) od strane Regulatorne agencije za komunikacije.

DIO DRUGI - PRAVA OPERATORA ELEKTRONSKIH KOMUNIKACIJSKIH MREŽA

Član 3.

(Minimalna lista prava)

- (1) Svaki operator javne elektronske komunikacijske mreže može:
 - a) biti vlasnik ili posjedovati javne elektronske komunikacijske mreže namijenjene za pružanje javnih telekomunikacijskih usluga;
 - b) instalirati javne elektronske telekomunikacijske mreže sa pravom građenja i instaliranja preko javnih ili privatnih površina, prema relevantnim procedurama i propisima kojima se uređuje pitanje građenja na javnim i privatnim površinama, uz zaštitu prava lica preko čije imovine ili posjeda prelazi elektronska komunikacijska mreža;
 - c) koristiti radiofrekvencijski spektar za potrebe rada mreže, prema pravilima za dodjelu i korištenje radiofrekvencija;
 - d) samostalno pružati javne telekomunikacijske usluge na mreži iz tačke a) ovog stava, odnosno takve mreže davati u zakup drugim operatorima telekomunikacija, pod uslovom da je za obavljanje takvih telekomunikacijskih djelatnosti pribavljena propisana dozvola.

- (2) Kada se javna elektronska komunikacijska mreža koristi za pružanje javnih telekomunikacijskih usluga, uz mogućnosti navedene u stavu (1) ovog člana, operator može, ili će biti dužan:
 - a) pregovarati o interkonekciji sa drugim operatorima, i kada je to primjenjivo prihvatiti interkonekciju sa drugim operatorima javnih elektronskih komunikacijskih mreža;
 - b) pružati različite forme univerzalnih usluga, kao i pokrivati različite geografske oblasti u vezi sa pružanjem univerzalnih usluga, kada je u skladu sa odgovarajućim propisom ovlašten ili zadužen da to čini;
 - c) ispunjavati i druge obaveze definisane Zakonom o komunikacijama i propisima donesenim na osnovu tog zakona.

Član 4.

(Područje obavljanja djelatnosti)

- (1) Dodijeljenom dozvolom operator stječe pravo da djeluje i pruža svoje usluge na područjima općina na koje se odnosi dodijeljena dozvola.
- (2) Vrste dozvola:
 - a) Općinska mrežna dozvola za područje 1 općine.
 - b) Lokalna mrežna dozvola za područje do 3 teritorijalno povezane općine
 - c) Regionalna mrežna dozvola za područje od 4 do 10 teritorijalno povezanih općina,
 - d) Nacionalna mrežna dozvola za područje svih općina u Bosni i Hercegovini.
- (3) Operatoru se može dodijeliti jedna ili više dozvola iz stava (2) tačkaka a), b) i c) ovog člana, pod uslovom da se jedna općina ne može nalaziti uključena u više dozvola izdatih istom operatoru.

- (4) Agencija će dodjeljivati dozvole iz stava (2) tačka a) ovog člana i u posebnim slučajevima kada se putem određene elektronske mreže namjeravaju pružati javne telekomunikacijske usluge:
- a) veliki poslovni objekti u kojim usluge pruža više davalaca telekomunikacijskih usluga koji su interkonektovani na instaliranu elektronsku mrežu takvog objekta, a ta mreža se nalazi pod kontrolom vlasnika objekta ili drugog pravnog lica;
 - b) bežične mreže izgrađene u nelicenciranom radioopsegu, a koje služe isključivo za pružanje usluga u IP tehnologiji;
 - c) satelitski linkovi na koje se interkonektuju javne elektronske mreže, radio ili televizijske stanice i drugi poslovni korisnici, kada se takvi satelitski linkovi nalaze pod kontrolom pravnog lica koje takav prijenos signala vrši kao vlastitu telekomunikacijsku uslugu.
- (5) Ukoliko određena vrsta mreže to zahtijeva, Agencija može posebnim aneksom dozvole urediti određene tehničke ili sigurnosne detalje rada i korištenja takve mreže.

DIO TREĆI - POSTUPAK ZA STJECANJE PRAVA NA OBAVLJANJE DJELATNOSTI

Član 5.

(Podnošenje zahtjeva)

- (1) Pravno lice iz člana 2. stav (1) ovog Pravila prije početka obavljanja djelatnosti operatora javnih elektronskih komunikacijskih mreža Regulatornoj agenciji za komunikacije podnosi zahtjev za izdavanje dozvole. Zahtjev se podnosi na obrascu koji će biti raspoloživ na web stranici Agencije: www.rak.ba.
- (2) Zahtjev za izdavanje dozvole je kompletiran ako sadrži:
- a) uredno popunjen obrazac zahtjeva, ovjeren potpisom i pečatom lica ovlaštenog za zastupanje;
 - b) izvod iz sudskog registra o registraciji firme ne stariji od mjesec dana, prije dana podnošenja zahtjeva;
 - c) ovjerenu kopiju uvjerenja o registraciji kod nadležne porezne uprave;
 - d) ovjerenu kopiju uvjerenja o određivanju Jedinstvenog identifikacijskog broja firme.
- (3) Po prijemu zahtjeva, Agencija će zaključkom pozvati podnosioca zahtjeva da u roku od 15 dana izvrši uplatu naknade za obradu zahtjeva kao i da izvrši uplatu administrativne takse na zahtjev.

Član 6.

(Izdavanje dozvole)

- (1) O ispunjenju uslova za izdavanje dozvole Agencija donosi poseban zaključak kojim će se pozvati podnosilac zahtjeva da u roku od 15 dana od dana izvršene dostave zaključka dostavi Agenciji dokaz o izvršenoj uplati administrativne takse na rješenje (dozvolu), kao i prvog iznosa naknade za korištenje dozvole prema računu koji će se podnosiocu dostaviti uz zaključak. Podnosilac zahtjeva neće se posebno opominjati u slučaju propusta da izvrši uplatu po zaključku iz ovog stava.
- (2) Po dostavljanju dokaza o izvršenom plaćanju iz stava (1) ovog člana, Agencija izdaje dozvolu i dostavlja je podnosiocu zahtjeva.

- (3) U slučaju da u roku od 30 dana od dana dostave zaključka iz stava (1) ovog člana ne bude izvršeno plaćanje administrativne takse na rješenje i prvog iznosa naknade za korištenje dozvole, smatrat će se da je podnosilac odustao od zahtjeva. U tom slučaju uplaćena administrativna taksa na zahtjev i naknada za obradu zahtjeva za izdavanje dozvole nepovratno propada.

Član 7.

(Sadržaj dozvole)

U dozvoli se navode osnovni podaci o nosiocu dozvole, područje obavljanja usluge, deklariše se pravo nosioca dozvole da obavlja djelatnost operatora javnih elektronskih komunikacijskih mreža, a može sadržavati i druge potrebne odredbe.

Član 8.

(Obavještanje o izdatoj dozvoli)

Agencija na svojoj web stranici www.rak.ba objavljuje listu aktivnih operatora sa pratećim informacijama o izdatoj dozvoli.

DIO ČETVRTI - TRŽIŠNA POZICIJA

Član 9.

(Nametanje posebnih obaveza)

Agencija je ovlaštena da operatorima za koje se utvrdi da prema odredbama Zakona o komunikacijama ili propisima donesenim na osnovu tog zakona imaju značajnu tržišnu snagu na relevantnom tržištu telekomunikacija, nametne osim općih prava i obaveza propisanih ovim Pravilom i druge posebne obaveze.

DIO PETI - MREŽNA USLUGA

Član 10.

(Mrežne usluge)

Na javnim elektronskim komunikacijskim mrežama mogu se pružati sljedeće usluge:

- a) komercijalne telekomunikacijske usluge za koje je Agencija izdala posebne dozvole ili za koje nije propisana obaveza pribavljanja posebne dozvole Agencije,
- b) iznajmljivanje slobodnih kapaciteta drugim operatorima, davaocima usluga ili posebnim poslovnim korisnicima putem davanja zakupa linija ili prijenosnog opsega,
- c) iznajmljivanje vodova bez učestvovanja u prijenosu signala („dark fibre“, izdvajanje petlje),
- d) interkonekcijske usluge,
- e) posebne komercijalne usluge prijenosa signala, uspostavljanja zatvorenih mreža i sl. za potrebe poslovnih korisnika, institucija i sistema.

Član 11.

(Obaveza obavještanja o zaključenim ugovorima)

- (1) O pružanju mrežnih usluga zaključuju se pisani ugovori.
- (2) Kada se ugovor zaključuje sa drugim licenciranim operatorom telekomunikacija (međuooperatorski ugovori) obavijest o zaključenju ugovora dostavlja se Agenciji u roku od 15 dana od dana zaključenja, na obrascu koji će biti raspoloživ na web stranici Agencije: www.rak.ba.

DIO ŠESTI - ZAKLJUČIVANJE MEĐUOPERATORSKIH UGOVORA

Član 12.

(Međuooperatorski ugovori)

- (1) Međuooperatorskim ugovorom smatra se svaki ugovor zaključen između operatora javne elektronske komunikacijske mreže i drugog takvog operatora ili davaoca javne telekomunikacijske usluge, pod uslovom da se takav ugovor odnosi na pružanje ili saradnju u pružanju javnih telekomunikacijskih usluga.
- (2) Međuooperatorski ugovori, pored općih obligaciono-pravnih elemenata, moraju sadržavati:
 - a) naznačenje pravnog osnova za obavljanje djelatnosti u telekomunikacijama ili pružanje javnih telekomunikacijskih usluga svake od ugovornih strana,
 - b) opis telekomunikacijskih usluga ili predmeta poslovne saradnje,
 - c) obim telekomunikacijskih usluga ili poslovne saradnje, opisano uz upotrebu tehničkih parametara, kapaciteta, drugih karakteristika, standarda ili opisano na drugi pogodan način,
 - d) vremensko trajanje ugovora sa tačnom naznakom perioda na koji je zaključen, odnosno naznakom minimalnog perioda na koji je ugovor zaključen ukoliko se isti zaključuje na neodređeno vrijeme,
 - e) uslove raskida ugovora uz precizan opis postupanja sa postojećim korisnicima usluga kako bi se osigurala neprekidnost pružanja usluga.
- (3) Operatori su dužni koristiti javnu elektronsku komunikacijsku mrežu i pružati, odnosno omogućiti pružanje usluga na takvoj mreži, u skladu sa odredbama međuooperatorskog ugovora i u skladu sa važećim propisima.

DIO SEDMI - STANDARDI ZA GRAĐENJE I RAD JAVNIH ELEKTRONSKIH KOMUNIKACIJSKIH MREŽA

Član 13.

(Primjenjivost standarda)

- (1) Operatori javnih elektronskih komunikacijskih mreža ovlašteni su za gradnju telekomunikacijske mreže u bilo kojoj primjenjivoj tehnologiji žičanog ili bežičnog prijenosa telekomunikacijskog signala, uz poštivanje standarda projektovanja, građenja i instalacije, rada i održavanja takvih mreža, prema primjenjivim standardima BiH, EU, ITU, ETSI, CEPT i drugim primjenjivim standardima, kao i pravilima Agencije.

- (2) Projektovanje javnih elektronskih komunikacijskih mreža mogu vršiti samo ovlaštena pravna i fizička lica, u skladu sa važećim propisima u Bosni i Hercegovini. Ukoliko je posebnim propisom Bosne i Hercegovine, Federacije Bosne i Hercegovine, Republike Srpske ili Brčko distrikta Bosne i Hercegovine propisano pribavljanje posebnog ovlaštenja za projektovanje javnih elektronskih komunikacijskih mreža, projektovanje mogu vršiti samo tako ovlaštena pravna ili fizička lica.
- (3) Svi elementi i uređaji koji se koriste u građenju i instaliranju javnih elektronskih komunikacijskih mreža moraju posjedovati odgovarajuće ateste ili homologacije izdate od nadležne institucije u Bosni i Hercegovini ili EU, zadovoljavati sve uslove elektromagnetne kompatibilnosti i ne smiju pričinjavati štetne smetnje radu drugih uređaja, telekomunikacijskih mreža i usluga ili opasnost po zdravlje ljudi.
- (4) Nadzor nad građenjem i instaliranjem javnih elektronskih komunikacijskih mreža vrši nadležni inspektor i organi nadležni za poslove građenja, shodno propisima entiteta i Distrikta Brčko BiH.
- (5) Tehnički nadzor nad radom javnih elektronskih komunikacijskih mreža vrši nadležni inspektor shodno propisima entiteta i Distrikta Brčko BiH.
- (6) Nadzor nad pružanjem usluga na javnim elektronskim komunikacijskim mrežama vrši Agencija.

Član 14.

(Upotrebna dozvola)

- (1) Javna elektronska komunikacijska mreža može se pustiti u rad samo nakon pribavljene upotrebne dozvole. Komisija za izdavanje upotrebne dozvole određuje se prema propisima entiteta ili Brčko distrikta Bosne i Hercegovine, shodno području na kojem se nalazi telekomunikacijska mreža.
- (2) Izuzetno, za potrebe testiranja operativnosti i međufunkcionalnosti može se odobriti testni rad javne elektronske komunikacijske mreže.
- (3) Agencija je isključivo nadležna za sve aspekte odobravanja i kontrole rada bežičnih javnih elektronskih komunikacijskih mreža, odnosno dijelova takvih mreža izvedenih u bežičnoj tehnologiji.

DIO OSMI - INTERKONEKCIJA

Član 15.

(Interkonekcija)

Interkonekcija javnih elektronskih komunikacijskih mreža vrši se u skladu sa Zakonom o komunikacijama i odgovarajućim propisima o interkonekciji donesenim na osnovu tog zakona.

DIO DEVETI - DODJELA RADIOFREKVENCIJA I MEĐUNARODNO POVEZIVANJE

Član 16.

(Korištenje radiofrekvencija)

- (1) Dodjela radiofrekvencija potrebnih za rad javnih elektronskih komunikacijskih mreža vrši se u skladu sa Zakonom o komunikacijama i odgovarajućim propisima o upravljanju radiofrekvencijskim spektrom.
- (2) U slučaju da je rad namjeravane javne elektronske komunikacijske mreže uslovljen korištenjem radiofrekvencija u opsegu za koji je propisano izdavanje dozvole Agencije, dodjela dozvole izvršit će se samo pod uslovom da su takve radiofrekvencije raspoložive.
- (3) Ako je to propisano, dodjela radiofrekvencija izvršit će se po javnom pozivu u proceduri kojom će se utvrditi koji podnositelj/podnosioci zahtjeva najbolje ispunjava uslove za dodjelu prava na korištenje radiofrekvencija.
- (4) U izuzetnim slučajevima, kada podnositelj zahtjeva dokaže da za to ima interesa, a radiofrekvencije se ne dodjeljuju u skladu sa stavom (3) ovog člana, dozvola će se dodijeliti bez obzira na raspoloživost radiofrekvencija koje su navedene u zahtjevu, pod uslovom da podnositelj zahtjeva da nedvosmisleno pismenu izjavu kojom prihvaća da mu se dodijeli dozvola bez garancije da će mu se kasnije dodijeliti predviđene radiofrekvencije.
- (5) Smatrat će se da podnositelj zahtjeva ima opravdan interes da mu se dodjeli dozvola na način iz stava (4) ovog člana ukoliko planira gradnju kombinovane javne elektronske komunikacijske mreže, te će započeti aktivnosti na izgradnji i korištenju kablovske mreže nezavisno od mogućnosti korištenja radiofrekvencija.
- (6) U slučaju iz stava (4) ovog člana smatra se da je podnositelj zahtjeva preuzeo odgovornost za sve eventualne finansijske, ekonomske i pravne posljedice svog zahtjeva vezano za kasniju nemogućnost dobivanja radiofrekvencija.

Član 17.

(Međunarodno povezivanje)

- (1) Pravo na međunarodno povezivanje ima pravno lice kojem je Agencija dodijelila Dozvolu za operatora javnih elektronskih komunikacijskih mreža, sa pravom pružanja usluga na lokalnom, regionalnom ili nacionalnom nivou.
- (2) Zahtjev za međunarodno povezivanje kablovskim putem podnosi se na obrascu koji će biti raspoloživ na web stranici Agencije: www.rak.ba.
- (3) Zahtjev za međunarodno povezivanje kablovskim putem odobrit će se ukoliko se utvrdi da:
 - a) postoji ozbiljna namjera operatora iz BiH o uspostavi međupovezivanja sa operatorom iz druge države, izražena u obliku sporazuma ili ugovora o poslovnoj saradnji;
 - b) postoji ekonomsko-tehnička opravdanost zahtjeva;
 - c) postoji idejni projekat za uspostavljanje međunarodnog povezivanja, sa jasno naznačenom tehnologijom koja će se primijeniti, kapacitetima, pravcima pružanja i mjestima povezivanja mreža.
- (4) Postupak odobravanja međunarodnog povezivanja bežičnim putem vrši se u skladu sa Instrukcijom o uslovima i načinu dodjeljivanja dozvola za međunarodne mikrovalne linkove tačka – tačka („Službeni glasnik BiH“, broj 85/05).
- (5) Za postupak izdavanja saglasnosti za međunarodno povezivanje javnih elektronskih komunikacijskih mreža naplaćuje se administrativna taksa na zahtjev, kao i administrativna taksa na rješenje.
- (6) Agencija vodi evidenciju ostvarenog međunarodnog povezivanja javnih elektronskih komunikacijskih mreža u Bosni i Hercegovini.

DIO DESETI - OMETANJE OPERATORA I PREKRŠAJI U OBAVLJANJU DJELATNOSTI

Član 18.

(Zabrana ometanja)

- (1) Operator javne elektronske komunikacijske mreže ne smije poduzimati bilo kakve radnje sa ciljem ometanja javnih elektronskih komunikacijskih mreža i usluga drugih operatora.
- (2) Aktivnosti operatora elektronske komunikacijske mreže naročito ne smiju uključivati sljedeće kategorije nedozvoljenih radnji:
 - a) podsticanje ili organizovanje vandalizma radi nanošenja oštećenja mrežama i uslugama drugog operatora;
 - b) sprečavanje zakonite izgradnje javnih elektronskih komunikacijskih mreža;
 - c) primjena drugih mjera i radnji koje se mogu podvesti pod nelojalnu konkurenciju, ako se mogu direktno povezati sa drugim operatorom i usmjerene su prema njemu, a ne spadaju u neku od naprijed navedenih kategorija.
- (3) Agencija neće voditi postupke radi dokazivanja zabranjenih aktivnosti iz stava (2) ovog člana, nego se postojanje takvih aktivnosti dokazuje dostavljenim rješenjima nadležnih inspeksijskih i drugih organa, ili presudama nadležnih sudova, pod uslovom da se iz takvih akata može nedvosmisleno utvrditi da je došlo do zabranjene aktivnosti, te da se nedvosmisleno može utvrditi koji je operator organizovao ili naložio takvo zabranjeno djelovanje.
- (4) Aktivnosti iz stava (2) ovog člana predstavljaju kršenje uslova dozvole.

Član 19.

(Prekršaji)

Prekršaji, vrste kazni i iznosi novčanih kazni za kršenja ovog Pravila propisani su Prijegledom povreda i odgovarajućih kazni koje izriče Regulatorna agencija za komunikacije („Službeni glasnik BiH“, broj 35/2009).

DIO JEDANAESTI - INFORMACIJE

Član 20.

(Obaveza dostavljanja informacija)

- (1) Operator je dužan, na način i u formi koju zatraži Agencija, dostavljati sve informacije u vezi sa obavljanjem svoje djelatnosti, podatke o svom poslovanju i druge primjenjive informacije potrebne za obavljanje regulatornih nadležnosti Agencije.
- (2) Obaveza dostavljanja informacija smatra se uslovom izdate dozvole.

DIO DVANAESTI - NAKNADE ZA OBAVLJANJE DJELATNOSTI

Član 21.

(Naknade)

- (1) Iznosi i uslovi plaćanja naknade za obradu zahtjeva za izdavanje dozvole i naknade za godišnje korištenje dozvole uređuju se posebnim pravilom Agencije.
- (2) U slučaju neplaćanja u propisanom roku naknade za godišnje korištenje dozvole, Agencija će istekom 30 dana od dana kada se trebalo izvršiti plaćanje po službenoj dužnosti donijeti rješenje kojim će oglasiti da je dozvola za koju nije plaćena naknada prestala važiti.
- (3) U slučaju da je onemogućena dostava rješenja iz stava (2) ovog člana na adresu poslovanja operatora upisanu u sudskom registru pravnih lica, dostava će se izvršiti putem oglasne ploče Agencije, a obavijest o tome će se staviti i na web stranicu Agencije: www.rak.ba. Dostava će se smatrati izvršenom 15 dana od dana stavljanja rješenja na oglasnu ploču Agencije.
- (4) Na osnovu rješenja iz stava (2) ovog člana, Agencija će o naplati neizmirene naknade odlučiti posebnim rješenjem kojim se nalaže plaćanje naknade, i koje se donosi u skraćenom upravnom postupku.

Član 22.

(Prestanak važenja dozvole po izjavi)

- (1) Po izjavi operatora da prestaje sa korištenjem dozvole, Agencija će po službenoj dužnosti donijeti rješenje kojim će oglasiti da je dozvola prestala važiti sa danom određenim tim rješenjem.
- (2) U slučaju da postoji neizmiren dug sa danom prestanka važenja dozvole, Agencija će o naplati neizmirene naknade odlučiti po službenoj dužnosti posebnim rješenjem koje se donosi u skraćenom upravnom postupku.
- (3) Danom prestanka važenja dozvole prestaje važiti i pravo korištenja radiofrekvencija korištenih za rad elektronske komunikacijske mreže, bez obzira da li se radi o licenciranom ili nelicenciranom opsegu, bez obzira da li su za naprijed navedene dozvole plaćene naknade.
- (4) Prestankom važenja dozvole prestaje i pravo na obavljanje djelatnosti. Operator je dužan danom davanja izjave o prestanku obavljanja djelatnosti, ili posebno naznačenim danom, obustaviti obavljanje djelatnosti i korištenje prava iz dozvole.

DIO TRINAESTI - SPAJANJE I PODJELA OPERATORA

Član 23.

(Statusne promjene operatora)

- (1) Ukoliko operator izvrši statusne promjene u vidu spajanja, pripajanja, podjele operatora ili osnivanja nove firme uz izdvajanje djelatnosti telekomunikacija od strane istih osnivača, novo pravno lice zadržat će pravo na korištenje dozvole samo ako ispuni uslove iz člana 2. stav (2) ovog Pravila.
- (2) U slučaju statusnih promjena iz stava (1) ovog člana, sporazumom ili ugovorom kojim se uređuju te statusne promjene ujedno se moraju urediti i pitanja nastavka obavljanja djelatnosti operatora i preuzimanja postojećih pravnih obaveza nastalih u vezi sa pružanjem usluga na mreži ili ugovorenog pristupa mreži koji je prije nastupanja statusne promjene pružen drugom operatoru telekomunikacija.

- (3) Kod izdvajanja djelatnosti uz osnivanje nove firme, smatra se da se radi o istim osnivačima ako je osnivački kapital nove firme istovjetan najmanje 51% osnivačkog kapitala sa više od 50% istih osnivača prethodnog operatora, i pod uslovom da postoji odluka osnivača postojećeg operatora o izdvajanju djelatnosti.
- (4) Operator je prije izvršenog spajanja, pripajanja, podjele ili izdvajanja djelatnosti, Agenciji dužan dostaviti pismenu obavijest o namjeri izvršenja statusne promjene, te je uz tu obavijest dužan dostaviti odgovarajuću odluku osnivača kao i sporazum ili ugovor kojim se uređuje promjena.
- (5) Pravno lice koje je preuzelo obavljanje djelatnosti operatora elektronske komunikacijske mreže dužno je najkasnije 15 dana, po izvršenoj statusnoj promjeni iz ovog člana, o tome pismeno obavijestiti Agenciju.
- (6) Uz obavijesti iz stava (5) ovog člana, pravno lice koje je preuzelo djelatnost dužno je podnijeti zahtjev za prijenos dozvole. Dozvola će se prenijeti ako se ispune uslovi za izdavanje dozvole propisani ovim Pravilom. O izvršenom prijenosu dozvole donosi se posebno rješenje.
- (7) Do donošenja rješenja iz stava (6) ovog člana, pravno lice koje je preuzelo djelatnost operatora nastavlja pružati ugovorene usluge prema uslovima dozvole operatora koji se spojio ili pripojio, što će se utvrditi posebnim rješenjem. Za pružanje usluge u navedenom periodu naplaćuje se naknada kao da je pravnom licu koje je preuzelo djelatnost operatora dodijeljena dozvola.
- (8) Ukoliko se utvrdi da pravno lice koje je preuzelo djelatnost operatora ne ispunjava uslove za dodjelu dozvole, ali da se radi o otklonjivim nedostacima, naložit će se posebnim zaključkom rok za otklanjanje nedostataka koji neće biti duži od 3 mjeseca.
- (9) Na postupak iz ovog člana naplaćuje se administrativna taksa na zahtjev i administrativna taksa na rješenje.

DIO ČETRNAESTI - PRODAJA MREŽNE INFRASTRUKTURE ILI PRIJENOS DJELATNOSTI

Član 24.

(Prodaja mrežne infrastrukture)

- (1) Operator koji u cijelosti ili djelimično prodaje svoju mrežnu infrastrukturu, dužan je o tome sačiniti odgovarajući ugovor. Ugovorom će se posebno urediti pitanje nastavka neometanog pružanja usluga na javnoj elektronskoj mreži.
- (2) U slučaju da se na mrežnoj infrastrukturi koja je predmet prodaje vrši pružanje usluga ili je sa drugim operatorom ugovoren i omogućen pristup mreži radi pružanja njegovih usluga, tada se sporazumom ili ugovorom kojim se uređuje prodaja mrežne infrastrukture moraju urediti i pitanja nastavka obavljanja djelatnosti i preuzimanja postojećih pravnih obaveza nastalih u vezi sa pružanjem usluga na mreži ili dijelu mreže koji je predmet prodaje.
- (3) Mrežna infrastruktura koja se proda pravnom licu koje u skladu sa odredbama ovog Pravila, ili drugih propisa ili dozvola Agencije nije steklo prava operatora javne telekomunikacijske mreže, ili koje nema takva prava na području gdje se nalazi mreža koja je predmet prodaje, ne može se koristiti za pružanje javnih telekomunikacijskih usluga sve dok novi vlasnik mrežne infrastrukture ne stekne odgovarajuće ovlaštenje shodno propisima ili dozvolama Agencije.
- (4) O prodaji mrežne infrastrukture operator je dužan pismeno obavijestiti Agenciju, najkasnije 15 dana od dana zaključenog ugovora.

DIO PETNAESTI - PRIJENOS DOZVOLE

Član 25.

(Prijenos dozvole)

- (1) Prijenos dozvole vrši se kada drugo pravno lice kojem se namjerava prenijeti mrežna infrastruktura ili djelatnost, sa pravima i obavezama iz dodijeljene dozvole, nema iste osnivače kao operator koji namjerava prenijeti dozvolu.
- (2) Smatra se da se radi o istim osnivačima ako je osnivački kapital nove firme istovjetan najmanje 51% osnivačkog kapitala, sa više od 50% istih osnivača predhodnog operatora, pod uslovom da postoji odluka osnivača operatora o prijenosu dozvole.
- (3) Pravno lice na koje se prenosi dozvola dužno je dati pismenu izjavu o preuzimanju svih prava i obaveza nastalih po osnovu dozvole do dana izvršenog prijenosa, a posebno prava prema drugim operatorima i poslovnim korisnicima koji su na osnovu ugovora sa operatorom koji prenosi dozvolu stekli pravo pružanja svojih usluga na mreži koju je operator uspostavio na osnovu dozvole, ili su uzeli u zakup kapacitete mreže radi pružanja svojih usluga.
- (4) Pravno lice koje nije ovlašteno da obavlja djelatnost operatora javne telekomunikacijske mreže, a namjerava preuzeti dozvolu od postojećeg operatora putem prijenosa dozvole, dužno je uz izjavu iz stava (3) ovog člana podnijeti i zahtjev iz člana 5. stav (1) ovog Pravila.

DIO ŠESNAESTI - PRELAZNE I ZAVRŠNE ODREDBE

Član 26.

(Prelazne odredbe)

- (1) Agencija će po službenoj dužnosti i u granicama ranije stečenih prava izdati dozvole u skladu sa uslovima ovog Pravila svim operatorima kojima je izdata Opća dozvola za javnog mrežnog operatora.
- (2) Postupak prelaska izvršit će se bez obaveze plaćanja posebne naknade. Agencija može tražiti dostavu informacija i dokumentacije u svrhu tog postupka.

Član 27.

(Obaveze ISP u nelicencnom opsegu)

Davaoci pristupa Internetu (ISP) koji su shodno pravima dodijeljenim Općom dozvolom za pružanje Internet usluga, izgradili svoje bežične pristupne mreže koje rade u nelicenciranom opsegu radiofrekvencija, dužni su u roku od 6 mjeseci, od dana stupanja na snagu ovog Pravila, podnijeti zahtjev iz člana 5. ovog Pravila radi dodjele Dozvole za operatora javnih elektronskih komunikacijskih mreža.

Član 28.

(Provedbeni propisi)

Kada je to potrebno radi provedbe ovog Pravila, Agencija je ovlaštena da u skladu sa članom 61. stav (2) i članom 99. Zakona o upravi („Službeni glasnik BiH“, broj 32/02 i 102/09) donese odgovarajuća uputstva, instrukcije i naredbe. Za donošenje takvih propisa ovlašten je generalni direktor Agencije.

Član 29.

(Prestanak važenja ranijih propisa)

Danom stupanja na snagu ovog Pravila prestaje važiti „Instrukcija o uslovima i načinu davanja saglasnosti za međunarodno povezivanje javnih telekomunikacijskih mreža kablovskim putem“ („Službeni glasnik BiH“, broj 22/06).

Član 30.

(Stupanje na snagu i objava)

Ovo Pravilo stupa na snagu osmog dana od dana objavljivanja u „Službenom glasniku BiH“.

Sarajevo, 10.10.2012. godine

Broj: 01-02-2760-1/12

PREDSJEDAVAJUĆI VIJEĆA

Neven Tomić